

Capitolo di una lettera.

Perchè so vostra magnificentia esser desiderosa de intender nove, *maxime* dil signor Sophis, li dico, come ozi, per lettere de merchadanti de Aleppo, come el capitano del dicto signor Sophi, con persone 2000 in circha, rompete un campo de persone 4000 del signor Aliduli, e tutti tajadi a pezi, insieme con suo fiolo et duo suoi fioli, tal che non era scapolà altro cha 3 persone. E come Alidulli havea mandà ambasadori al signor de Aleppo; non se intende la richiesta soa, perchè al partir de la caravana de Aleppo l'era intrà; e questo si à da novo. Occorendo altro, vostra magnificentia per mie sarà avisato del tutto.

138

Dil mexe di fevrer 1507.

A dì primo fevrer. Introe capi di 40, a la banca di sopra: sier Sabastian da cha' Taiapiera, sier Vetur Minoto et sier Alvixe Miani; capi dil consejo di X: sier Anzolo Trivixan, sier Domenego Contarini et sier Francesco Foscari, cavalier.

Da poi disnar, il principe andò per terra a vespore a Santa Maria Formosa, con li oratori, Franza, Spagna et quel di Milan, dil gran maestro, monsignor de, et Ferara. Portò la spada sier Pangrati Zustignan, va capitano a Ravenna; fo suo compagno sier Alvixe Sanudo, è provedador al sal. Poi fo colegio di savij.

A dì 2, fo la Madonna. De more, il principe a messa con li oratori, in chiesa di San Marco. Et poi disnar fo colegio di savij.

È da saper, in questi giorni vene in questa terra uno francese, stato con il Soffi in campo certi zorni. El qual fo preso dil campo dil tureho, et menato dal Soffi, intese era christiano, li fece bona compagnia e lo messe con uno da cha' Zorzi, fradello di quelli da cha' Zorzi, stratioti, che vene con sier Zuan Valaresso, *olim* consolo di Damasco, qui stati schiavi, e fono presi a Negroponte. Or, questo da cha' Zorzi à tre ducati al dì dal Soffi per la sua persona di provision e le spexe. *Etiã* disse assa' cosse di Soffi e di so riti et modi et età, che *fortasse* in una relatione qui avanti sarà scripta. Dice è potente signor, à 40 milia combatenti con arme bianche, poi il resto di l' exereito assa' numero; si à parentato con Alidulli, et à tolto una sua fiola per moglie; vol esser contra il tureho; et che mai il suo exereito con quel dil tureho non sono stati a le mano, como

fo ditto; et che non è ritratto, ma per l' inverno messossi in lochi forti, et stassi col suo exereito, et a tempo novo se intenderà gran cosse. Disse molte altre cosse; el qual va a Roma. Or questo portò certe monede di Soffi, tra le qual una, che val ducato uno e mezo, con queste lettere, qual avi, et tutto lettere da una banda e l'altra, qual tradute dice cussi. *El primo:*

Non è Dio altro che un sol Dio,
E Machometo messo d' esso Dio,
Ali secretario de esso,

Machometo el potente,
Alli el posente,
Asen el valente,
Oscen dal bon esempio,
Alli, fiol d.l posente,
Machometo el vitorioso,
Chaffar el veritevole,
Moixè el compido,
Alli el coreytor,
Machometo el fedel.

Da l'altra banda:

El soldam justo, el compido,
El coretor e donador,
El vitorioso, el re Smayl,
Beador, fio de Zien,
El Soffi, che Dio prospera el suo regno e potenza.

E questa è stampida nel suo paese.

Et nota, vidi per avanti una altra soa moneda d' armento, di valuta di mezo ducato, con queste lettere, tradute in latin dice cussi:

Da una banda: Justicia et ben comune,

Da l'altra: Pace et libertà.

A dì 3. In colegio vene do oratori di Verona, 138^o domino Zuan Lodovico Faella, dottor et cavalier, et domino Andrea di Pelegrini, cavalier. Et parlò il Faella, dimostrando gran fede di quella comunità versso la Signoria nostra; ma ben suplichano, che, atento il provedador zeneral e li rectori habino adattà zercha li strami, da esser pagati per li soldati a ducati 2 il charo, et havendo fato il pagamento in 4 page, che saranno 6 mexi e più, pregano la Signoria provedi più presto *etc.* Il principe li deteno bone parole, dicendo saria più presto *etc.*